

第二三冊

明倫彙編

皇極典

帝紀部

(卷)
一二九—一三〇

古今圖書集成

中華書局影印

古今圖書集成
目錄

卷一

古今圖書集成

中華書局影印

欽定古今圖書集成明倫彙編皇極典

第一百十九卷目錄

帝紀部彙考一百十三

元五

世祖四

皇極典第一百十九卷

帝紀部彙考一百十三

元五

世祖本紀四

按元史世祖本紀至元十年春正月乙卯朔高麗國王王禘遣其世子樸來朝戊午勅自今並以國字書宣命命忻都鄭溫洪茶丘征耽羅宿州萬戶愛先不花請築堡牛頭山以扼兩淮糧運不允愛先不花因言前宋人城五河統軍司臣皆當得罪今不築恐爲宋人所先帝曰汝言雖是若坐視宋人戍之罪亦不死也安南使者還言陳光昞受詔不拜中書移文責問光昞稱從本俗改回回愛薛所立京師醫藥院名廣惠司已未禁鷹坊擾民及陰陽圖讖等書癸亥阿里海牙等大攻樊城拔之守將呂文煥懼而請降中書省驛聞遣前所俘唐永堅持詔諭之丁卯立祕書監戊辰給皇子北平王甲一千置軍器未盈二庫分典弓矢甲寅庚午簽陝西探馬赤軍己卯川蜀省言宋皆萬壽攻成都也速帶兒所部騎兵征建都未還

擬於京兆等路簽新軍六千爲援從之詔遣扎木阿押失寒崔杓持金十萬兩命諸王阿不合市藥獅子國王壬午賞東川統軍合刺所部有功者合刺請於渠江之北雲門山及嘉陵西岸虎頭山立二戍以其圖來上仍乞益兵二萬詔給京兆新簽軍五千益之二月丙戌以皇后皇太子受冊寶遣太常卿合丹告於太廟丙申雲南羅羽酋會長阿旭叛詔有司安集其民募能捕斬阿旭者賞之遣斷事官麥吉勾校川陝行省錢穀詔勸馬刺失里乞帶脫因劉源使緬國諭遣子弟近臣來朝高麗國王王禘以王師征耽羅乞下令禁俘掠聽自製兵仗從之丁未朱京西安撫使知襄陽府呂文煥以城降三月甲寅朔詔中諭大司農司遣使巡行勸課務要農事有成乙丑勅樞密院以襄陽呂文煥率將吏赴闕熟券軍并城居之民仍居襄陽給其田牛生券軍分隸各萬戶翼文煥等發襄陽擇蒙古漢人有才力者護視以來丙寅帝御廣寒殿遣攝太尉中書右丞相安童授皇后弘吉刺氏玉冊玉寶遣攝太尉同知樞密院事伯顏授皇太子真金玉冊金寶辛未以皇后皇太子受冊寶詔告天下劉整請教練水軍五六萬及於興元金洋州汴梁等處造船二千艘從之壬申分金齒國爲兩路癸酉客星青白如粉絮起畢度五車北復自文昌貫斗杓歷梗河至左攝提凡二十一日以前中書左丞相耶律撻不章軍國重事中書左丞張惠爲中書右丞車駕幸上都西蜀嚴忠範以罪罷遣察不花等撫治軍民罷中興等處行中書省夏四月癸未阿里海牙以呂文煥入朝授文煥昭勇大將軍侍衛親軍都指揮使

襄漢大都督賜其將校有差時將相大臣皆以聲罪南伐爲請驛召姚樞計衡徒單公履等問計公履對曰乘破竹之勢席卷三吳此其時矣帝然之詔罷河南等路行中書省以平章軍國重事史天澤平章政事阿木魯知政事阿里海牙行荊湖等路樞密院事鎮襄陽左丞相合丹參知行中書省事劉整山東都元帥塔出董文炳行淮西等路樞密院事守正陽天澤等陸續詔諭以襄陽之南多有堡寨可乘機進取仍以鈔五千錠賜將士及賑新附軍民甲申免隆興路權課三年丁酉敕南儒爲人掠賣者官贖爲民辛丑罷四川行省以華昌二十四處便宜總帥汪良臣行西川樞密院東川閬達廣安順慶夔州利州等路統軍使合刺行東川樞密院東川副統軍王仲仁同簽行樞密院事仍命汪良臣就率所部軍以往五月壬子朔定內外官復舊制三歲一遷甲寅禁無籍軍從大軍殺掠其願爲軍者聽戊辰詔天下獄因除殺人者待報其餘一槩疎放限以八月內自至大都如期而至者皆赦之乙亥詔免民代輸簽軍戶絲銀及伐木夫戶賦稅負前朝官錢不能償者毋徵主守失陷官錢者杖而釋之降亡軍及營繕工匠無丁產者量加廩給以雄易州復隸大都庚辰賞襄陽有功萬戶奧魯赤等銀鈔衣服有差六月乙酉賑諸王塔察兒部民饑丁亥以各路弓矢甲匠並隸軍器監免大都南京兩路賦役以紓民力賑甘州等處諸驛辛卯汰陝西貧難軍以劉整阿里海牙不相能分軍爲二各統之癸巳勅襄陽造戰船千艘甲午改資用庫爲利用監丁酉置光州等處招討司戊申經略忻都等

兵至耽羅撫定其地詔以失里伯爲耽羅國招討使尹邦寶副之陞拱衛直爲都指揮司使日本趙良弼至太宰府而還具以日本君臣爵號州郡名數風俗土宜來上閏月癸丑勅諸道造甲一萬弓五千給淮西行樞密院已罷東西兩川統軍司辛未以翰林院纂修國史勅采錄累朝事實以備編集丙子以平章政事賽典赤行省雲南統合刺章鴨赤赤科金齒茶罕章諸蠻賜銀二萬五千兩鈔五百錠秋七月辛巳以金州軍八百人及統軍司還成都忽朗吉軍千人隸東川壬午以修太廟將遷神主別殿遣兀魯忽奴帶張文謙祭告丙戌敕樞密院襄陽生券軍無妻子者發至京師仍益兵衛送其老疾者遣還家庚寅河南水發粟賑民饑仍免今年田租省西涼府入未昌路戊申高麗國王王禔遣其順安公王棕同知樞密院事宋宗禮賀皇后皇太子受冊禮成八月庚戌朔前所釋諸路罪囚自至大都者凡二十二人並赦之甲寅鳳翔寶雞縣劉鐵妻一產三男復其家三年丁丑聖誕節高麗王王禔遣其上將軍金說來賀己卯賜襄陽生熟券軍冬衣有差九月辛巳遼東饑弛獵禁以合伯爲平章政事壬午立河南宣慰司供給荆湖淮西軍需甲申襄陽生券軍至大都詔伯顏諭之釋其械繫免死罪聽自立部伍俾征日本仍勅樞密院具鎧仗人各賜鈔娶妻于蒙古漢人內選可爲率領者丙戌劉秉忠姚樞王磐實默徒單公履等上言許衡疾歸若以太子贊善王恂主國學庶幾衡之規模不致廢墜又請增置生員並從之秉忠等又奏置東宮官師府詹事以次官屬三十八人戊子遣官

詣荆湖行省差次有功將士禁京畿五百里內射獵己丑勅自今秋獵鹿豕先薦太廟壬辰中書省臣奏高麗王王禔屢言小國地狹比歲荒歉其生券軍乞駐東京詔令營北京界仍勅東京路運米二萬石以賑高麗丁酉立正陽諸驛勅河南宣慰司運米三十萬石給淮西合答軍仍給淮西京湖軍需有差壬寅敕會同館專居降附之人觀者以翰林學士承旨和禮霍孫兼會同館事以主朝廷咨訪及降臣奏請征東招討使塔匣刺請征骨鬼部不允丙午置御藥院車駕至上都給諸王塔察兒所部布萬匹冬十月乙卯享於太廟丙辰以西川編民東川義士軍屯田餉潼川青居戍兵勅伯顏和禮霍孫以史天澤姚樞所定新格參考行之庚申御史臺臣言沒入贓罰爲鈔一千三百錠詔有貪多不能存者以此賑之有司斷死罪五十人詔加審覆其十三人因圖毆殺人免死充軍餘令再三審覆以聞禁牧地縱火以合答帶爲御史大夫陞襄陽府爲路罷廣寧府新簽軍初建正殿殿殿香閣周廡兩翼室西蜀都元帥也速答兒與皇子奧魯赤合兵攻建都蠻酋酋長下濟等四人獲其民六百建都乃降詔賞將士有差十一月癸未命布只兒修起居注丁未大司農司言中書移文以畿內秋禾始收請禁農民覆耕恐妨芻牧帝以農事有益詔勿禁十二月己酉朔安童等言昔博赤伯都謂總管府權太重宜立運司并諸軍奧魯以分之臣以今之民官循例遷徙保無邪謀別立官府於民未便帝然之壬子賜襄樊被傷軍士鈔千錠甲寅宋夏貴攻正陽淮西行院擊走之壬戌召阿木同呂文煥

入覲大司農司請罷西夏世官括諸色戶從之安南國王陳光昞遣使來貢方物諸王薛闊禿以罪從軍累戰皆捷召赴闕己巳省陝州就路朱陽二縣入靈寶賜萬戶解汝棹銀萬五千兩諸王李兀兒出率所部兵與皇子北平王合軍討叛臣聶古伯平之賞立功將士有差賜諸王金銀幣帛如歲例是歲諸路蟲螭災五分霖雨害稼九分賑米凡五十四萬五千五百九十石天下戶一百九十六萬二千七百九十五十一年春正月己卯朔宮闕告成帝始御正殿受皇太子諸王百官朝賀高麗國王王禔遣其少卿李義孫等來賀兼奉歲貢乙酉以金州招討使欽察率襄陽生熟券軍千人戍鴨池庚寅初立軍官以功陞散官格免諸路軍雜賦以忙古帶等新舊軍一萬一千五百人戊建都立建都軍遠都護府兼領互市監王辰置西蜀四川屯田經略司丁酉長春宮設周天金籙醮七晝夜勅荆湖行院以軍三萬水弩砲手五千隸淮西行院丙午彰德趙當道等以謀逆伏誅餘從者論罪有差立于闕鴉兒看兩城水驛十三沙州北陸驛二免于闕采玉工差役阿里海牙言荆襄自古用武之地漢水上流已爲我有順流長驅宋必不可平阿木又言臣略地江淮備見宋兵弱于往昔今不取之時不能再帝趣召史天澤同議天澤對曰此國大事可命重臣一人如安童伯顏都督諸軍則四海混同可計日而待矣臣老矣如副將者猶足爲之帝曰伯顏可以任吾此事矣阿木阿里海牙因言我師南征必分爲三舊軍不足非益兵十萬不可詔中書省簽軍十萬人二月戊申朔賜阿木所部將士及茶罕

章阿吉老者等銀鈔有差甲寅太陰犯井宿庚申新德副元帥楊堯元戰沒以其子襲職初立儀鸞局掌宮門管餉供帳燈燭壬申造戰船八百艘於汴梁以廉希憲爲中書右丞北京等處行中書省事車駕幸上都三月己卯詔以勸課農桑諭高麗國王王禔仍命安撫高麗軍民總管洪茶丘提點農事己丑呂文煥隨司千戶陳炎謀叛誅首惡二人其隨司軍併其妻子皆令內徙庚寅勸鳳州經略使忻都高麗軍民總管洪茶丘等將屯田軍及女直軍并水軍合萬五千入戰船大小合九百艘征日本移劄門兵戍合答城辛卯改荆湖淮西二行樞密院爲二行中書省伯顏史天澤並爲左丞相阿木爲平章政事阿里海牙爲右丞呂文煥爲參知政事行中書省於荆湖合答爲左丞相劉整爲左丞塔出董文炳爲參知政事行中書省於淮西遣使代祀嶽瀆后土河南宣慰司言軍輿轉輸煩重宜賦軍匠諸戶權助財用從之癸巳獲嘉縣尹常德謀最諸縣詔優賞之亦乞里帶強取民租產桑園廬舍墳墓分爲探馬赤軍牧地詔還其民萬戶阿里必嘗發李壇逆謀爲壇所殺以其子刺刺吉襲職改金州招討司爲萬戶府遣要速木咱與慙失招諭八魯國帝師八合思八歸土番國以其弟亦鄰眞襲位建大護國仁王寺成夏四月辛亥分陝西隴右諸州置提刑按察司治鞏昌癸丑初建東宮甲寅誅西京說言惑衆者括諸路馬五萬匹辛未詔安慰幹端鴉兒看合失合兒等城賜襄樊戰死之士二百四十九人之家每家銀百兩乙亥命也速帶兒將千人同撒吉思所部五州丁壯戍益都五月丙戌

汪惟正以所部軍逃亡乞於民站戶選補從之勅北京東京等路新簽軍恐不宜暑權駐上都乙未樞密院臣言舊制蒙古軍每十人月食糧者惟拔都二人今遣怯薛丹合丹數其數多籍二千六百七十人勅杖合丹無入宿衛謫往西川效死軍中餘定罪有差丙申以皇女忽都魯揭里迷失下嫁高麗世子王禔辛丑勅隨路所簽新軍其戶絲銀均配於民者並除之六月丙午朔劉整乞益甲仗及水弩手給之庚戌賜建都合馬里戰士銀鈔有差癸丑勅合答選部下蒙古軍五千人與漢軍分戍沿江堡隘爲使傳往來之衛仍以古不來拔都翟文彬率兵萬人掠荆南鴉山以緩宋之西兵丙辰免上都隆興兩路簽軍庚申問罪於宋詔諭行中書省及蒙古漢軍萬戶千戶軍士曰爰自太祖皇帝以來與宋使介交通憲宗之世朕以藩職奉命南伐彼實假道復遣宋京詣我請罷兵息民朕卽位之後追憶是言命郝經等奉書往聘蓋爲生靈計也而乃執之以致師出連年死傷相藉係累相屬皆彼來自禍其民也襄陽既降之後冀宋悔禍或起令圖而乃執迷罔有懷心所以問罪之師有不能已者今遣汝等水陸並進布告遐邇使咸知之無辜之民初無預焉將士毋得妄加殺掠有去逆效順別立奇功者驗等第還賞其或固拒不從及逆敵者俘戮何疑甲子分遣忙古帶八都百家奴率武衛軍南征丙寅以合刺合孫爲中書左丞崔斌參知政事仍行河南道宣慰司事勅有司閱覈延安新軍貧無力者免之戊辰監察御史言江淮未附將帥關人今首用阿里海牙子忽失海牙劉整子瑛素不知

兵且缺人望宜依弟男例罷去從之秋七月乙亥朔勅山北遼東道提刑按察使兀魯失不花同參知政事廉希憲行省北京國王頭聲哥母署事有大事則希憲等就議乙酉徙生券軍八十一人屯田和林癸巳高麗國王王禔薨遣使以遺表來上且言世子樞孝謹可付後事勅同知上都留守司事張煥開樞爲高麗國王乙未伯顏等陸辭帝諭之曰古之善取江南者唯曹彬一人汝能不殺是吾曹彬也興元鳳州民獻麥一莖四穗至七穗穀一莖三穗八月甲辰朔頒諸路立社稷壇壝儀式丁未史天澤言今大帥方興荆湖淮西各置行省勢位既不相下號令必不能一後當敗事帝是其言復改淮西行中書省爲行樞密院癸丑行中書省言江漢未下之州請令呂文煥率其麾下臨城諭之令彼知我寬仁善遇降將亦策之善者也從之甲寅弛河南軍器之禁辛未高麗王樞遣其樞密使朴麥來賀聖誕節詔太原新簽軍遠戍兩川誠可憫恤諭樞密院遣使分括庫粟給其家九月丙戌行中書省以大軍發襄陽檄諭宋州郡官吏將校士民癸巳師次鹽山距郢州二十里宋兵十餘萬當郢來漢水城萬勝堡兩岸戰艦千艘鐵組橫江貫大艦數十過舟師不得下惟黃家灣有溪經鶴子山入唐港可達於江宋又爲築堡其處駐兵守之繫舟數百與渠相依伯顏督諸軍攻拔之繫渠挽舟入漢出唐港整列而進車駕自上上都冬十月己酉享於太廟庚申長河西千戶必刺沖剽掠甲仗集衆爲亂火徐赤移戊未遣副元帥覃澄率屬東赴之帝曰澄不必獨往趣益兵三千付火徐赤合力討之

壬戌歲星犯壘壁陣乙丑伯顏督諸將破沙洋堡生擒守將申樓王翌日次新城總制黃順純城降伯顏遣順招都統邊居義不出總管李庭破其外堡諸軍蟻附而登拔之居義自焚死辛未賜北平王南木合馬三萬羊十萬十一月庚辰斷死罪三十九人壬午勒西川行樞密院也速帶兒取嘉定府癸未符寶郎董文忠言比聞益都彰德妖人繼發其按察司達魯花赤及社長不能禁止宜令連坐詔行之乙酉軍次復州宋安撫使翟貴出降丁亥詔宋嘉定安撫皆萬壽及凡守城將校納款來降與避罪及背主叛亡者悉從原免癸巳東川元帥楊文安與青居山蒙古萬戶怯烈乃也只里等會兵達州直趣雲安軍至馬湖江與宋兵遇大破之遂拔雲安羅拱高陽城堡賜文安等金銀有差以香河荒地千頃置中衛屯伯顏遣萬戶帖木兒譯史阿里奏沙洋新城之捷且以新城總制黃順來見賜順黃金錦衣及細甲授湖北道宣慰使佩虎符勅京師盜詐者衆宜峻立治法名征日本忽敦忽察劉復亨三沒合等赴闕王寅安童以阿合馬擅財賦權蠹國害民凡官屬所用非人請別加選擇其營作宮殿貪緣爲姦亦宜詰問帝命窮治之起閣南直大殿及東西殿增選樂工八百人諫教坊司十二月丙午伯顏大軍次漢口宋淮西制置使夏貴都統高文明劉儀以戰船萬艘分據諸隘都統王達守陽羅堡荆湖宣撫朱禔孫以游擊軍扼中流師不得進用千戶馬福言自漢口開堤引船會淪河口徑趨沙蕪遂入大江癸丑以諸路逃奴之無主者二千人隸行工部甲寅賞忻都等征耽羅功銀鈔幣帛

有差乙卯阿里海牙督萬戶張弘範等攻武磯堡宋夏貴以兵來援阿术率萬戶晏徹兒等四翼軍對青山磯泊丙辰萬戶史格以一軍先渡爲宋荆鄂諸軍都統程鵬飛所敗總管史塔刺渾等率衆赴敵鵬飛敗走進軍沙洲抵觀音山夏貴東走遂破武磯堡斬宋都統王達始達南岸追至鄂州南門而還丁巳伯顏登武磯山宋朱禔孫遁歸江陵己未師次鄂州宋直祕閣湖北提舉張晏然權知漢陽軍王儀知德安府來與國並以城降程鵬飛以本軍降伯顏承制以宋鄂州民兵總制王該知鄂州事王儀來與國仍舊任撤其戍兵分隸諸軍下令禁侵暴凡逃民悉縱還之以阿里海牙兵四萬鎮鄂漢伯顏阿术將大軍水陸東下以侍衛親軍都指揮使禿滿帶爲諸軍殿以襄陽路總管賈居貞爲宣撫使商議行中書省事庚申淮西正陽火廬舍甲仗焚蕩無餘杖萬戶愛先不花等有差癸亥賜太一真人李居素第一區仍賜額曰太一廣福萬壽宮行中書省以渡江捷聞勅縱呂文煥隨司軍悉還家割南陽盧氏縣隸嵩州置歸德宋城縣長武縣省入涇州良原縣省入靈臺是歲天下戶一百九十六萬七千八百九十八諸路好畛等蟲災凡九所民餓殍米七萬五千四百一十五石粟四萬五百九十九石以賑之

十二年春正月癸酉朔高麗國王王愷遣其判閣事李信孫來賀及奉歲幣甲戌大軍次黃州宋沿江制置副使知黃州陳奕以城降伯顏承制授奕沿江大都督其子嚴知漣州奕遣人以書諭之書至嚴即出降乙亥徙襄陽新民七百戶於河北東川副都元帥張德潤拔禮義城殺宋安撫使張資招降軍民千五百餘人繼遣元帥張桂孫略地俘總管郭武及都轄唐惠等六人以歸賜德潤金五十兩及西錦金鞍細甲弓矢部下將士鈔五百錠戊寅劉整卒安西王相府乞給鈔萬錠爲軍需勅以千錠給之癸未師次蘄州宋安撫使管景模以城降乙酉勅樞密院以納忽帶兒也速帶兒所統戍軍及再簽登萊丁壯八百人付五州經略司其郟城十字路亦聽經略司節度丙戌大軍次江州宋江西安撫使知江州錢眞孫及淮西路六安軍曹明以城降丁亥樞密院臣言宋邊郡如嘉定重慶江陵鄂州澧海等處皆阻兵自守宜降璽書招諭從之未知南康軍葉闡以城降勅以侍衛親軍指揮使札的失囊加帶將蒙古軍二千百家奴唐古忙兀兒將漢軍萬人赴蔡州禿滿帶賈忙古帶復將餘兵赴闕己丑遣伯木唐末堅齋招諭鄂州仍勅襄陽統軍司調兵三千人衛送末堅等還蒙古畏吾漢人十四人赴行中書省爲新附州郡民官庚寅遣左衛指揮副使鄭溫唐古帖木兒率衛軍萬人同札的失囊加帶戍黃州詔諭重慶府制置司并所屬州郡城寨官吏軍民舉城歸附壬辰以宣撫使賈居貞簽書行中書省事戍鄂州安南國使者還勅以舊制籍戶設達魯花赤簽軍立站輪租及歲貢等事諭之乙未遣兵部尚書廉希賢工部侍郎嚴忠範祕書監丞柴紫芝奉國書使於宋丁酉以萬家奴所募願爲軍者萬人南征己亥雲南總管信且石買等刺殺合刺章舍里威之爲亂者以金賞之命土酋至雲南趣阿魯帖木兒入覲以蠻裔未附者尚多命宜

慰司兼行元帥府事並聽行省節度置郡縣尹長選廉能者任之置雲南諸路規措所以贍思丁爲使益衛送唐求堅兵求堅求拜都忙古帶偕行許之勅追諸王海都八刺金銀符三十四月癸卯大軍次安慶府宋殿前都指揮使知安慶府范文虎以城降伯顏承制授文虎兩浙大都督甲辰以中書右丞博魯歡爲淮南都元帥中書右丞阿里左右副都元帥仍命阿里撒吉思等各部蒙古漢軍會邳州又發斬宿戍兵將河南戰船千艘赴之遣必閣赤李羅檢覈西夏權課命開元宣撫司販吉里迷新附饑民勸畏吾地春夏毋獵孕字野獸立后土祠於平陽之臨汾伏羲女嫫毘湯河濱等廟於河中解州洪洞趙城丙午大軍次池州宋權州事趙昂發自經死都統制張林以城降省西夏中興都轉運司入總管府議以中統鈔易宋交會并發蔡州鹽貿易藥材丁未禁無籍自效軍俘掠新附復業軍民戊申詔諭江黃鄂岳漢陽安慶等處歸附官吏士民軍匠僧道人等令農者就耒商者就途士庶緇黃各安己業如或鎮守官吏妄有騷擾詣行中書省陳告史天澤卒召游顯楊庭訓赴闕賜陳言人霍昇張和鈔十錠俾從淮東元帥府南征庚戌遣禮部侍郎杜世忠兵部郎中何文著齋書使日本國辛亥遣同知濟南府事張漢英持詔諭淮東制置使李庭芝壬子洛磁路總管姜毅捕獲農民郝進等四人造妖言惑衆救誅進餘滅死流遠方宋都督賈似道遣計議宋京承宣使阮思聰詣行中書省請還已降州郡約貢歲幣伯顏使囊加帶同阮思聰還報命留宋京以待使謂似道曰未渡江時入

貢議和則可今沿江諸郡皆已內屬欲和則當來面議也囊加帶還乃釋宋京以同簽樞密院事倪德政赴鄂州省治財賦癸丑御史臺臣劾前南京路總管田大成以其弟婦趙氏爲妻廢絕人倫敕杖八十三年不齒時大成已死惟市杖趙氏八十丙辰賞征東元帥府日本戰功錦綉弓矢鞍勒庚申遣塔不帶幹魯名鄂漢降臣張晏然等赴闕仍諭之曰朕省卿所奏云宋之權臣不踐舊約拘留使者實非宋主之罪儼蒙聖慈止罪擅命之臣不令趙氏之祀者卿言良是卿既不忘舊主必能輔弼我家比卿奏上已遣伯顏按兵不進仍遣兵部尚書廉希賢等持書往使果能悔過來附既在之愆朕復何究至於權臣實似道尚無罪之心況肯令趙氏之祀乎若其執迷罔悛未然之事朕將何言天其鑒之辛酉以闊闢出率其部下軍千人及親附軍五百聽阿剌海牙節制凡湖南州縣及瀨水之民有來附者俾闊闢出統之拒敵不降者就爲招集詔今大洪山避兵民還歸漢陽復業農畝命阿剌海牙鎮守之復命阿失罕唐末堅基公直等與脫烈將甲騎千人持詔招諭鄂州大軍次丁家洲戰船蔽江而下宋賈似道分遣步帥孫虎臣及督府節制軍馬蘇劉義集兵船於江之南北岸似道與淮西制置使夏貴將後軍戰船二千五百餘艘橫亘江中翌日伯顏命左右翼萬戶率騎兵夾岸而進繼命舉巨砲擊之宋兵陣動夏貴先遁似道錯愕失措鳴鉦斥諸軍散宋兵遂大潰阿木與鎮撫何瑋李庭等舟師及步騎追殺百五十里得船二千餘艘及軍資器仗督府圖籍符印似道東走揚州阿先不

花言夏貴縱北軍岳全還稱欲內附宜降璽書招諭遂遣其甥胡應雷持詔往諭之甲子大軍次蕪湖縣朱江東運判知太平州孟之縉以城降都元帥博魯歡次海州知州丁順以城降乙丑阿里海牙言江陵宋巨鎮地居大江上流屯精兵不啻數十萬若非乘此破竹之勢取之江水泛溢鄂漢之城亦恐難守從其請仍降璽書遣使諭江陵府制置司及高達已下官吏軍民宋福州團練使知特摩道事農士貴率知那寡州農天或知阿吉州農昌成知上林州農道賢州縣三十有七戶十萬詣雲南行中書省請降丙寅樞密院言渡江初亳州萬戶史格毗陽萬戶石抹紹祖以輕進致敗乞罪之有旨或決罰降官或以戰功自贖其從行省裁處禁民間賭博犯者流之北地戊辰師次采石鎮知和州王善以城降都元帥博魯歡次漣州宋知州孫嗣武以城降己巳復遣伯木唐末堅等宣諭鄂州官吏士庶庚午大軍次建康府宋沿江制置使趙潛南走都統權兵馬司事徐王榮翁福茅世雄等及鎮軍曹旺以城降未賈似道至揚州始遣總管致佑送國信使郝經劉人傑等來歸救樞密院迎經等由水路赴闕詔安南國王陳光昞仍以舊制六事諭之趣其來朝命怯薛丹察罕不花侍儀副使關思義真人李德和代祀嶽瀆后土車駕幸上都三月壬申朔宋鎮江府馬軍總管石祖忠以城降行中書省分遣淮西行樞密院阿塔海駐京口朱誅殿帥韓震其部將李大明等二百人攜震母妻并諸子文煊文煥自臨安來奔甲戌宋江陰軍食判李世脩以城降乙亥諭樞密院比遣建都都元帥火倫赤征

長河西以副都元帥覃澄鎮守建都付以璽書安集其民仍救安西王忙兀刺諸王只必帖木兒駙馬長吉分遣所部蒙古軍從西平王奧魯赤征吐蕃命萬執中唐末堅同前所遣阿失罕等將銳兵千人同往招諭鄂州已降則鎮之不得則從陸路與阿里海牙忽不來會於荆南丙子國信使廉希賢等至建康傳旨令諸將各守營壘毋得妄有侵掠未知滁州王文虎以城降戊寅賜皇子安西王幣帛八千匹絲萬斤乙卯改平陰縣新鎮寨為肥城縣隸濟寧府庚辰未知寧國府顏紹卿以城降江東路得府二州五軍二縣四十三戶八十三萬一千八百五十二口一百九十一萬九千一百六甲申於中興路置懷遠靈武二縣分處新民四千八百餘戶丙戌宋常州安撫戴之泰通判王虎臣以城降國信使廉希賢嚴忠範等至朱廣德軍獨松關為宋人所殺丁亥免諸路軍雜賦辛卯宋將高世傑復據岳州質知州孟之紹妻子又取復州降將翟貴妻子送之江陵世傑會鄂復岳三州及上流諸軍戰船數千艘兵數萬人扼荆江口壬辰阿里海牙以軍屯於東岸世傑夜半遁去黎明至洞庭湖口兵船成列而陣阿里海牙督諸翼萬戶及水軍張榮實解汝楫等逐世傑於湖口之夾灘遣郎中張鼎召世傑世傑降阿里海牙以世傑招岳州孟之紹亦以城降以世傑力屈而降誅之賜北平王南木合所部馬二千一百八十三匹三百癸巳救郢城沂州十字路戍兵從博魯歡征淮南丙申側布蕃官稅昔確州蕃官莊察男車甲等率四十三族戶五千一百六十詣四川行樞密院來附戊戌遣山東路經略

使王儼戍岳州庚子從王磐實默等請分置翰林院專掌蒙古文字以翰林學士承旨撒的迷底里主之其翰林兼國史院仍舊纂修國史典制詰備顧問以翰林學士承旨兼修起居注和禮霍孫主之辛丑救阿木分兵取揚州夏四月壬寅朔賞討長河西必刺充有功者及陣亡者金銀鈔幣帛各有差乙巳改西夏中興道按察司為隴右河西道丙午立漣州新城清河三驛阿里海牙駐軍江陵城南沙市攻其柵破之知荆門軍劉懋降丁未阿里海牙遣郎中張鼎齋詔入江陵宋荆湖制置朱禔孫湖北制置副使高達京西湖北提刑青陽夢炎李湜始出降阿里海牙入江陵分道遣使招諭未下州郡知峽州趙真知歸州趙仔權澧州安撫毛浚常德府新城總制魯希文舊城權知府事周公明等悉以城降辛亥遣使招諭宋五郡鎮撫使呂文福使降甲寅諭中書省議立登聞鼓如為人殺其父母兄弟夫婦冤無所訴聽其來擊其或以細事唐突者論如法辛酉宋郢州安撫趙孟復州安撫翟貴以城降宋度支尚書吳浚移書建康徐王榮等述其丞相陳宜中語請罷兵逼好伯顏遣中書議事官張羽淮西行院令史王章同宋來使馬馭持徐王榮復書至平江府驛亭悉為宋所殺癸亥阿木師駐瓜洲距揚州四十五里宋淮東制置司盡焚城中廬舍遷其居民而去阿木創立樓櫓戰具以守之丙寅立尚牧監賜降臣丁順等衣服免京畿百姓今歲絲銀丁卯以大中司農御史中丞字羅為御史大夫罷隨路巡行勸農官以其事入提刑按察司括諸寺闡遺人口庚午以高達為參知政事仍詔慰諭

之遣兵部郎中王世英刑部郎中蕭都持詔召嗣漢四十代天師張宗演赴闕五月辛未朔阿里海牙以所俘童男女千人牛萬頭來獻樞密院言峽州宜以戰船扼其津要又鄂復二州戍兵不足今擬襄陽等處選五千七百人隸行中書省聽阿里海牙調遣從之詔中書右丞廉希憲悉知政事脫博忽魯禿花行中書省於江陵府阿里海牙還鄂州立襄陽至荆南三驛丁丑阿木立木柵於楊子橋斷淮東糧道且為瓜洲藩蔽庚辰詔諭參知政事高達曰昔我國家出征所獲城邑即委而去之未嘗置兵戍守以此連年征伐不息夫爭國家者取其土地人民而已雖得其地而無民其誰與居今欲保守新附城壁使百姓安業力農蒙古人未之知也爾熟知其事宜加勉旃湖南州郡皆汝舊部曲未歸附者何以招懷生民何以安業聽汝為之宋嘉定安撫魯萬壽遣部將李立奉書請降言累負罪愆乞加赦免詔遣使招諭之辛巳宋知辰州呂文興黃仙洞行隋州事傅安國仙人寨行均州事徐鼎知沅州文用圭知靖州康玉知房州李鑑等皆以城降荆南湖北路凡得府三州十一軍四縣五十七戶八十萬三千四百一十五口一百一十四萬三千八百六十丙戌以三衛新附生券軍赴八達山屯田丁亥召伯顏赴闕以蒙古萬戶阿剌罕權行中書省事遣肅州達魯花赤阿沙簽河西軍萬戶愛先不花達伯顏節制擅撤戍兵詔追奪符印使從軍自效淮東宣撫陳巖乞解官終喪三年不許申嚴屠牛馬之禁庚寅宋五郡鎮撫使呂文福來降壬辰宋都統制劉師勇殿帥張彥據常州癸巳諭高麗

國王王愷招珍島餘黨之在耽羅者六月庚子朔日有食之宋嘉定安撫使督萬壽以城降賜名順癸卯遣兩浙大都督范文虎持詔往諭安豐壽州招信五河等處鎮戍官吏軍民遣刑部侍郎伯木諭朱禕孫以年老多病不任朝謁權留大都無自疑懼諭廉希憲等元沒青陽夢炎李湜家貴如籍還之併徙其家赴都甲辰以萬戶阿剌罕爲行中書省參知政事獲知開州張章赦其罪章二子柱楫先來降以其子故免死赦失里伯史樞率襄陽熟券軍二千獵戶丁壯二千同范文虎招安豐軍各賜馬十匹其故嘗從丞相史天澤者十九人願宣勞軍中令從樞以行戊申簽平陽西京延安等路達魯花赤弟男爲軍辛亥賞諸王兀魯所部獲功建都者三十五人銀鈔有差定兀魯衛士人各馬二匹從者一匹敕淮東元帥府發兵及鄂州戍兵與李璫舊部曲并前河南已簽軍萬人後免爲民者復籍爲兵並付行中書省戊午詔遣使招諭宋四川制置趙定應比者畢再興青陽夢炎赴闕面陳蜀閩事宜奏請緩師令自納款姑從所請今遣再興宣布大信若能順時達變可保富貴毋爲塗炭生靈自貽後悔庚申遣重慶府招討使畢再興持詔招諭宋合州節度張珪江安潼川安撫張朝宗涪州觀察陽立梁山軍防禦馬壁辛酉宋潼川安撫使知江安州梅應春以城降乙丑以漣海新附丁順等括船千艘送淮東都元帥府丙寅宋揚州都統姜才副將張林步騎二萬人乘夜攻楊子橋木柵守柵萬戶史弼來告急阿木自瓜洲以兵赴之詰旦至柵下才軍夾水爲陣阿木麾騎兵渡水擊之陣堅不動

阿木軍引却才軍來逼我軍與力戰才軍遂走阿木麾步騎並進大敗之才僅以身免生擒張林斬首萬八千級戊辰放塔出率阿塔海也速帶兒兩軍赴漣水以孫攤爲耽羅國達魯花赤罷山東經略司秋七月庚午朔阿木集行省諸翼萬戶兵船于瓜洲阿塔海董文炳集行院諸翼萬戶兵船于西津渡宋沿江制置使趙潛樞密都承旨張世傑知泰州孫虎臣等陳舟師于焦山南北阿水分遣萬戶張弘範等以拔都兵船千艘西掠珠金沙辛未阿木阿塔海登南岸石公山指授諸軍水軍萬戶劉琛循江南岸東趣夾難繞出敵後董文炳直抵焦山南麓以擒其右招討使劉國傑趣其左萬戶忽剌出擣其中張弘範自上流繼至趣焦山之北大戰自辰至午呼聲震天地乘風以火箭射其箭蓬宋師大敗世傑虎臣等皆遁走追至圖山獲黃鵠白鶴船數百艘宋人自是不復能軍翌日宋平江都統劉師勇殿帥張彥以兩浙制司軍至呂城復爲阿塔海行院兵所敗壬申簽雲南落蒲納烘等處軍萬人隸行中書省癸酉太白犯井詔取茶罕章未附種落丁丑立衛州至楊村水驛五己卯增置燕南河北道提刑按察司以蔡州驛蒙古軍四百隸阿里海牙漢軍六百從萬戶宋都帶赴江西壬午遣使招宋淮安安撫使朱煥癸未詔遣使江南搜訪儒醫僧道陰陽人等敕左丞相伯顏率諸將直趣臨安右丞阿里海牙取湖南蒙古萬戶宋都帶漢軍萬戶武秀張榮實李恆兵部尚書呂師夔行都元帥府取江西罷淮西行樞密院以右丞阿塔海參政董文炳同署行中書省事辛卯太陰犯畢甲午遣

使持詔招諭宋李庭芝及夏貴以伯顏爲中書右丞相阿木爲中書左丞相八月己亥免北京西京陝西等路今歲絲銀癸卯伯顏陞辭南行奉詔諭宋君臣相率來附則趙氏族屬可保無虞宗廟悉許如故授故奉使大理王君侯子如珪正八品官己未升任城縣爲濟州辛酉車駕至上都丙寅高麗王王愷遣其樞密副使許珙將軍趙珪來賀聖誕節九月己巳太白犯少民庚午阿合馬等以軍與國用不足請復立都轉運司九量增課程元額鼓鑄鐵器官爲局賣禁私造銅器乙亥賞清河新城戰士及死事者銀千兩鈔百錠賜西平王所部鴨城戍兵人馬三匹丁丑以襄陽官牛五千八百賜貧民弛河南露馬之禁賜東西川屯戍蒙古軍糧鈔有差戊寅諭太常卿合丹去冬享太官敕牲無用牛今其復之己卯太白犯太微西垣上將壬午阿木築灣頭堡乙酉罷襄陽統軍司甲午宋揚州都統姜才將步騎萬五千人攻灣頭堡阿木阿塔海擊敗之賞淮安招討使乞里迷失及有功將士錦衣銀鈔有差丙申以玉昔帖木兒爲御史大夫括江南諸郡書版及臨安秘書省乾坤寶典等書冬十月戊戌朔享於太廟辛丑弛北京義錦等處獵禁癸丑太陰犯畢十一月丁卯阿里海牙以軍攻潭州乙亥伯顏分軍爲三趣臨安阿剌罕率步騎自建康四安廣德以出獨松嶺董文炳率舟師循海趣許浦澈浦以至浙江伯顏阿塔海由中道節度諸軍期並會于臨安丙子宋權融宜欽三州總管岑從殺沿邊巡檢使廣西節制軍馬李維屏等詣雲南行中書省降丁丑阿合馬奏立諸路轉運司凡十一所

己卯宋都帶等軍次隆興府宋江西轉運使知府劉
榮以城降都元帥府檄諭江西諸郡相繼歸附得府
州六軍四縣五十六戶一百五萬一千八百二十九
口二百七萬六千四百五十五戶至常州督諸
軍登城四面並進拔其城劉師男變服單騎南走改
順天府爲保定府樞密院言兩都平澤獵戶新發軍
二千皆貧無力者宜存恤其家又新附郡縣有既降
復叛及糾衆爲盜犯罪至死者既已款伏乞聽權宜
處決皆從之中書省臣議斷死罪詔今後殺人者死
問罪狀已白不必待時宜即行刑其奴婢殺主者具
五刑論乙酉阿剌罕克廣德趣獨松關丙戌太陰犯
軒轅大星己丑遣太常卿合丹以所獲塗金爵三獻
於太廟庚寅伯顏遣降人游介實奉璽書副本使于
宋仍以書諭宋大臣甲午以高麗國官制僭濫遣使
諭旨凡省院臺部官名爵號與朝廷相類者改正之
十二月戊戌填星犯亢己亥簽書四川行樞密院事
咎順言紹慶府施州南平及諸蠻呂告馬蒙阿末等
有嚮化之心又播州安撫楊邦憲恩州安撫田景賢
未知逆順乞降詔使之自新並許世紹封爵從之辛
丑董文炳軍次許浦宋都統制祁安以本軍降宋主
爲書介國信副使嚴忠範煙煥請和甲辰伯顏次平
江府宋都統王邦傑以城降乙巳免江陵等處今歲
田租丁未改諸站提領司爲通政院戊申中書左丞
相忽都帶兒與內外文武百寮及縉黃耆庶請上皇
帝尊號曰憲天述道仁文義武大光孝皇帝皇后曰
貞懿順聖昭天睿文光應皇后不許太陰犯畢庚子

西川滄溪知縣趙龍遣間使入宋救流遠方籍其家
癸亥敕樞密院靖州既降復叛今已平定其遣張通
判李信家屬并同叛者赴都甲子答宋國主書令其
來降丙寅阿剌罕軍次安吉州宋安撫使趙興可以
城降升高麗東寧府爲路割江東南康路隸江西省
置馬湖路總管府省重慶路隆化縣入南川瀘州海
山縣入昌黎縣復華州鄖縣是歲衛輝太原等路旱
河間霖雨傷稼凡賑米三千七百四十八石粟二萬
四千二百六十石天下戶四百七十六萬四千七十七
斷死罪六十八人

宋主復遣尚書夏士林右史陸秀夫奉書稱姪乞和

欽定古今圖書集成明倫彙編皇極典

第一百二十卷目錄

帝紀部彙考一百十四

元六

世祖五

皇極典第一百二十卷

帝紀部彙考一百十四

元六

世祖本紀五

按元史世祖本紀至元十三年春正月丁卯朔克潭州宋安撫使李希憲室自焚死阿里海牙分遣官屬招徠未附者旬日間湖南州郡相繼悉降得府一州六軍二縣四十戶五十六萬一千一百一十二口百五十三萬七千七百四十伯顏軍次嘉興府安撫劉漢傑以城降董文炳軍次乍浦宋統制官劉英以本軍降辛未董文炳軍至海鹽知縣事王與賢及澈浦鎮統制胡全福建路馬步軍總管沈世隆皆降壬申改都統領司爲通政院命兀良合帶等領之立同易庫於諸路凡十有一掌市易幣帛諸物敕大都路總管府和順和買權豪與民均輸癸酉宋相陳宜中遣軍器監劉庭瑞齋宋主稱藩表章詣軍前稟議又致宜中等書于伯顏伯顏以書答之乙亥詔諭四川制置使趙定應來朝徙大都等路獵戶戍大洪山之東

符寶郎董文忠請貧病者勿徙從之宋復遣監察御史劉岳齋宋主稱藩表至軍前且致書伯顏爲宗社生靈請命丙子賞合兒魯帶所部將士征建都功銀鈔錦衣丁丑宋遣都統洪模齋陳宜中吳堅等書請俟宗長福王至同詣軍前戊寅伯顏以軍出嘉興府留萬戶忽都虎千戶王禕林察戍之劉漢傑仍爲其府安撫使辛巳命雲南行省給建都屯軍弓矢軍次崇德縣宋遣侍郎劉庭瑞都統洪模來進行都元帥府宋都帶言江西隆興建昌撫州等郡雖附而閩廣諸州尚阻兵乞增兵進討敕以襄漢軍四千俾將之壬午軍次長安鎮董文炳以兵來會宋陳宜中吳堅等違約不至癸未軍次臨平鎮甲申次高亭山阿剌罕以兵來會宋主遣其保康軍承宣使尹甫和州防禦使吉甫等齋傳國玉璽及降表詣軍前其辭曰大宋國主曩謹百拜奉表於大元仁明神武皇帝陛下臣昨嘗遣侍郎柳岳正言洪雷震捧表馳詣闕庭敬伸卑悃伏計已徹聖聽臣眇焉幼冲遭家多難權奸似道背盟誤國臣不及知至於與師問罪宗社陷危生靈可念臣與太皇日夕憂懼非不欲還辟以求兩全實以百萬生民之命寄臣之身今天命有歸臣將焉往惟是世傳之鎮寶不敢愛惜謹奉太皇命戒痛自貶損削帝號以兩浙福建江東西湖南湖北二廣四川見在州郡謹悉奉上聖朝爲宗社生靈祈哀請命欲望聖慈垂哀祖母太后耄及臥病數載臣焚香在疚情有足於不忍臣祖宗三百年宗社遽至頽絕曲賜裁處特與存全大元皇帝再生之德則趙氏子孫世世有賴不敢弭忘臣無任感天望聖激切屏營之

至伯顏既受降表玉璽復遣囊加帶以趙尹甫買餘慶等還臨安召宰相出議降事乙酉師次臨安北十五里囊加帶洪模以總管殷俊來報宋陳宜中張世傑蘇劉義劉師勇等挾益廣二王出嘉會門渡浙江遁去惟太皇太后嗣君在官伯顏亟使諭阿剌罕董文炳范文虎率諸軍先據守錢塘口以勁兵五千人追陳宜中等過浙江不及而還丙戌伯顏下令禁軍士入城違者以軍法從事遣呂文煥齋黃榜安諭臨安中外軍民俾按堵如故時宋三司衛兵白晝殺人張世傑部曲尤橫閭里小民乘時剽殺令下民大悅伯顏又遣宣撫程鵬飛計議孫鼎亨囊加帶洪君祥入宮安諭太皇謝氏丁亥雲南行省賽典赤以改定雲南諸路名號來上又言雲南貿易與中州不同鈔法實所未諳莫若以交會貶于公私通行庶爲民便並從之戊子中書省臣言王孝忠等以罪命往八荅山採寶玉自効道經沙州值火忽叛孝忠等自拔來歸令於瓜沙等處屯田從之大名路達魯花赤小鈴部坐姦賊伏誅沒其家宋主祖母謝氏遣其丞相吳堅文天祥樞密謝堂安撫賈餘慶中貴鄧惟善來見伯顏於明因寺伯顏顧文天祥舉動不常疑有異志遂令萬戶忙古帶宣撫暖都羈留軍中且以其降表不稱臣仍書宋號遣程鵬飛洪君祥偕來使賈餘慶復往易之己丑軍次湖州市遣千戶囊加帶省豫王祐齋傳國玉璽赴闕救高麗國以有官子弟爲質中書省臣言賦民舊籍已有定額至元七年新括協濟合併戶爲數凡二十萬五千一百八十敕減今歲絲賦之半庚寅伯顏建大將旗鼓率左右翼萬戶巡臨

安城觀潮浙江於是宋宗室大臣以次來見暮還湖州辛卯張弘範孟祺程鵬飛齋所易宋主稱臣降表至軍前甲午復薊州平谷縣立隨路都轉運司仍詔諭諸處管民官以覓吉刺帶丑漢所部軍五百成哈答城不吉帶所部軍六百移成建都其兀兒禿唐忽軍前在建都者並遣還翼穿濟州漕渠以真定總管昔班爲中書右丞二月酉詔劉頡程德輝招淮西制置使夏貴已亥克臨江軍庚子宋主焘率文武百僚詣祥曦殿望闕上表乞爲藩輔遣右丞相兼樞密使賈餘慶樞密使謝堂端明殿學士簽樞密院事家鉉翁端明殿學士同簽樞密院事劉岳奉表以聞宋主祖母太皇太后亦奉表及賸是日宋文武百司出臨安府詣行中書省各以其職來見行省承制以臨安爲兩浙大都督府都督忙古帶范文虎入城視事辛丑伯顏令張惠阿刺罕董文炳左右司官石天麟楊晦等入城取軍民錢穀之數閱實倉庫收百官誥命符印悉罷宋官府散免侍衛禁軍宋主焘遣其右丞相賈餘慶等充祈請使詣闕請命右丞相命吳堅文天祥同行行中書省右丞相伯顏等以宋主焘舉國內附具表稱賀兩浙路得府八州六軍一縣八十一戶二百九十八萬三千六百七十二口五百六十九萬二千六百五十一丁未詔諭臨安新附府州司縣官吏士民軍卒人等曰聞者行中書省右丞相伯顏遣使來奏宋母后幼主洎諸大臣百官已於正月十八日齋豐綬奉表降附朕惟自古降王必有朝覲之禮已遣使特往迎致爾等各守職業其勿妄生疑畏凡歸附前犯罪悉從原免公私逋欠不得徵理應

抗拒王師及逃亡嘯聚者並赦其罪百官有司諸王邸第三學寺監祕省史館及禁衛諸司各宜安居所在山林河泊除巨木花果外餘物權免徵稅祕書省圖書太常寺祭器樂器法服樂工鹵簿儀衛宗正諸牒天文地理圖冊凡典故文字并戶口版籍盡仰收拾前代聖賢之後高尚儒醫僧道卜筮通曉天文歷數并山林隱逸名士仰所在官司具以名聞名山大川寺觀廟宇并前代名人遺跡不許拆毀錄寡孤獨不能自存之人量加贈給伯顏就遣宋內侍王堦入宮收宋國袞冕圭璧符璽及宮中圖書寶玩車輅輦乘鹵簿麾仗等物戊申立浙東西宣慰司於臨安以戶部尚書麥歸祕書監焦友直爲宣慰使吏部侍郎楊居寬同知宣慰司事並兼知臨安府事乙卯詔諭淮東制置使李庭芝淮西制置使夏貴及所轄州軍縣鎮官吏軍民丁巳命焦友直括宋祕書省禁書圖籍戊午祀先農東郊淮西制置夏貴以淮西諸郡來降唯鎮巢軍復叛貴遣使招之守將洪福殺其使貴親至城下福始降阿木斬之軍中淮西路得府二州六軍四縣三十四戶五十一萬三千八百二十七口一百二萬一千三百四十九庚申召伯顏偕宋君臣入朝辛酉車駕幸上都設資戒大會於順德府開元寺伯顏遣不伯周青招泉州蒲壽庚壽晟兄弟甲子董文炳陵都發宋隨朝文士劉褒然及三學諸生赴京師太學生徐應鑣父子四人同赴并死帝既平宋召宋諸將問曰爾等何降之易耶對曰宋有強臣賈似道擅國柄每優禮文士而獨輕武官臣等久積不平心離體解所以望風而送款也帝命董文忠答之

曰借使似道實輕汝曹特似道一人之過耳且汝主何負焉正如所言則似道之輕汝也固宜三月丁卯命樞密副使張易兼知祕書監事伯顏入臨安遣郎中孟祺籍宋太廟四祖殿景靈宮禮樂器冊寶洎郊天儀仗及祕書省國子監國史院學士院太常寺圖書祭器樂器等物戊辰括江南已附州郡軍器甲戌阿木遣使報廬州夏貴已降文天祥自鎮江遁去追之弗獲荆湖南路行中書省言潭州既定湖南州郡降者相繼即分命諸將鎮守其地從之宋福王與芮自浙東至伯顏軍中以獨松關守將張濡害殺奉使廉希賢斬之籍其家乙亥伯顏等發臨安丁丑阿塔海阿刺罕董文炳詣宋主宮趣宋主焘同太后入觀郎中孟祺奉詔宣讀至免繫頸牽羊之語太后全民聞之泣謂宋主焘曰荷天子聖慈活汝當望闕拜謝宋主焘拜畢子母皆肩輿出宮唯太皇太后謝氏以疾留戊寅赦諸路儒戶通文學者三千八百九十並免其徭役其富實以儒戶避役者爲民貧乏者五百戶隸太常寺救淮西廬州置總管萬戶府以中書右丞河南等路宣慰使合刺合孫襄陽管軍萬戶即淡並行府事庚辰襄加帶以宋主焘來上乙酉贛吉袁南安四郡內附庚寅賜郡王瓜都銀印敕上都和順和買並依大都例以中書右丞昔班爲戶部尚書閏月丙申置宣慰司於濟寧路掌印造交鈔供給江南軍儲以前西夏中興簽行中書省事暗都刺即恩大都路總管張守智並爲宣慰使東川行樞密院總帥汪惟正略地涪州克山寨谿洞凡二十有三所丁酉召湖廣阿里海牙忽都帖木兒赴闕令脫撥忽魯禿

花崖斌並留後鄂州辛亥命副樞張易遣宋降臣吳堅夏貴等赴上都戊午淮西萬戶府招降方山等六寨甲子禁西番僧持軍器以中書省左右司郎中郝禎叅知政事夏四月乙丑朔阿朮以宋高郵寶應營餽餉揚州遣蒙古軍將苦徹及史弼等守之別遣都元帥李魯歇等攻泰州之新城丁卯賜諸王都魯金印戊辰以河南兵事未息開元路民饑並弛正月五月屠殺之禁庚午敕南商貿易京師者毋禁辛未行江西都元帥宋都帶以應詔儒生醫士鄭夢得等六人進敕隸秘書監丙子省東川行樞密院及成都經略司以其事入西川行院復石人山寨居民於信陽軍免大都醫戶至元十二年絲銀己卯以待衛親軍征戍歲久放令還家期六月各歸其軍庚辰以水達達分地歲輸皮革自今並入上都壬午召嗣漢天師張宗演赴闕乙酉召昭文館大學士姚樞翰林學士王磐翰林侍講學士徒單公履赴上都庚寅修太廟以北京行中書省廉希憲為中書右丞行中書省事於荆南府五月乙未朔伯顏以宋主熈至上都制授黑開府儀同三司檢校大司徒封瀛國公以平宋遣官告天地祖宗於上都之近郊遣使代祀嶽瀆己亥伯顏請罷兩浙宣慰司以忙古帶范文虎仍行兩浙大都督府事從之庚子定度量壬寅宋三學生四十六人至京師癸卯復沂莒膠密寧海五州所括民為防城軍者為民免其租徭二年乙巳賜伯顏所部有功將校銀二萬四千六百兩阿朮遣總管陳傑攻拔泰州之新城遣萬戶烏馬兒守之以偏泰州丁未宋揚州都統姜才攻灣頭堡阿里別擊走之殺其步

騎四百人右衛親軍千戶董士元戰死戊申宋馮都統等自真州率兵二千戰船百艘襲瓜州阿朮遣萬戶昔里罕阿塔赤等出戰大敗之追至珠金沙得船七十七艘馮都統等赴水死改博州為東昌路己酉括獵戶鷹坊戶為兵乙卯靖州張州判及李信李發焚其城退保飛山新城行中書省發兵攻殺之徙其黨及家屬於大都宋江西制置黃萬石率其軍來附敕合入觀辛酉安西王相府請頒詔招合州張玘不從癸亥陞異樣局為總管府秩三品六月甲子朔敕新附三衛兵之老弱者放還其家己巳以孔子五十三世孫曲阜縣尹孔洵兼樞密院主事命東征元帥府還襄陽生券軍五百充待衛軍置行戶部於大名府掌印造交鈔通江南貿易庚午敕西京僧道也里可溫蒼失蠻等有室家者與民一體輸賦辛未命阿里海牙出征廣西請益兵選軍二萬俾將之壬申罷兩浙大都督府立行尚書省於鄂州臨安設諸路宣慰司以行省官為之並帶相銜其立行省者不立宣慰司甲戌以大明曆浸差命太子贊善王恂與江南日官置局更造新曆以樞密副使張易董其事易恂奏今之曆家徒知曆術平明曆理宜得者儒如許衡者商訂詔衡赴京師宋揚州姜才夜率步騎數千趨丁村堡守將史弼苦徹出戰斬首百餘級獲馬四十匹詰旦阿里都督陳岩以灣頭堡兵邀其後伯顏察兒踵至所將皆阿朮麾下兵姜才軍遙望旗幟即走達大破之獲米五千餘石阿朮又以宋人高郵水路不通必由陸路餽運千戶也先忽都以千騎邀之數日米運果來殺負米卒數千獲米三千石戊寅詔作平

金平宋錄及諸國臣服傳記仍命平章軍國重事耶律鑄監修國史戊子樞密院上言陳宜中張世傑聚兵福建以攻我師江西都元帥宋都帶求援命以安慶蘄黃等郡宿兵付宋都帶將之己丑宋都帶言福建魏天祐游義榮棄家來附以天祐為管軍總管兼知邵武軍事義榮遙授建寧路同知充管軍千戶壬辰下詔招諭宋揚州制置李庭芝以次軍官及通泰真滁高郵大小官員又詔諭陳宜中張世傑蘇劉義劉師勇等使降李庭芝遣朱煥守揚州與姜才率步騎五千東走阿朮親率百餘騎馳去督右丞阿里萬戶劉國傑分道追及泰州西殺步卒千人庭芝等僅得入遂築長圍壅而守之阿朮獨當東南面斷其走路以戶部尚書張瑄叅知政事行中書省事於北京秋七月乙未行中書省左右司郎中孟祺以亡宋金玉寶及牌印來上命太府監收之丙申淮安寶應民流寓邳州者萬餘口聽還其家丁酉宋涪州觀察陽立子嗣榮請降詔招諭其父從之戊戌陞閬州為保寧府敕山丹城直隸省部以達魯花赤行者仍領之壬寅以李庭芝出征賞其部將李承慶等鈔馬衣服甲仗有差乙巳朱煥以揚州降丁未詔諭廣西路靜江府等大小州城官吏使降甲寅賜諸王字羅印以楊村至灣鵝泊漕渠洞遠改從孫家務乙卯宋泰州守將孫良臣與李庭芝帳下卒劉發鄭俊開北門以降執李庭芝姜才繫揚州獄丙辰阿朮以總管烏馬兒等守泰州其通滁高郵等處相繼來附淮東路得州十六縣三十三戶五十四萬二千六百二十四口一百八萬三千三百一十七遣使持香幣祠嶽瀆后

士以中書右丞阿里海牙爲平章政事兼書樞密院事准東行樞密院別乞里迷失爲中書右丞兼知政事董文炳爲中書左丞准東左副都元帥塔出兩浙大都督范文虎江東江西大都督知江州呂師夔淮東淮西左副都元帥陳岩並參知政事八月己巳穿武清蒙村漕渠救漢軍都元帥闊闊帶李庭將侍衛軍二千人西征陞鄒陰縣爲鄒州乙亥斬宋淮東制置使李庭芝都統姜才於揚州市庚辰罷襄陽統軍司車駕至上都遣太常卿脫忽思以銅爵一豆二獻於太廟以四萬戶總管奧魯赤參知政事九月壬辰朔命國師益懌眞作佛事於太廟己亥享於太廟常饌外益野豕鹿羊蒲萄酒庚子命姚樞王磐選宋三學生之有實學者留京師餘聽還家辛丑遣瀘州屯田軍四千轉漕重慶癸卯以平宋赦天下乙巳高麗國王王愷上參議中議金方慶功授虎符丙午敕常德府歲貢包茅丁未諭西川行樞密院移檄重慶俾內附命有司隴沿淮城壘辛亥太白犯南斗甲寅太白入南斗乙卯以吐蕃合谷城爲軍遠府辛酉召宋宗臣鄂州教授趙興與京赴闕設資戒會於京師阿木入觀江淮及浙東西湖南湖北等路得府三十七州一百二十八關一監一縣七百三十三戶九百三十七萬四百七十二口千九百七十二萬一千一十五冬十月甲子以陳巖拔新城丁村功賜金五十兩部將劉忠等賜銀有差乙亥賜皇子北平王出征軍士貧乏者羊馬幣帛有差申明以良爲娼之禁丁亥兩浙宣撫使焦友直以臨安經籍圖書陰陽祕書來上戊子淮西安撫使夏貴請入觀乞令其孫貽孫權領

宣撫司事從之以淮東左副都元帥阿里爲平章政事河南等路宣慰使合剌合孫爲中書右丞兵部尚書王儀吏部尚書兼臨安府安撫使楊鎮河南河北道提刑按察使迷里忽辛並參知政事參知政事陳巖行中書省事於淮東十一月癸巳安西王所部軍克萬州丙午賜阿木所部有功將士二百三十九人各銀二百五十兩西川行院忽敦言所部軍士久圍重慶逃亡者衆乞益軍一萬并降詔招誘通民之在大良平者並從之壬子賜龍峇溫軍有功及死事者銀鈔有差癸丑併省內外諸司丁卯太陰犯填星庚申救管民及理財之官由中書銓調軍官由樞密院定議壞襄漢荆湖諸城南平招撫使兼知峽州事趙眞請降詔招諭夔州安撫張起巖從之高麗國王王愷遣其臣判祕書寺朱悅來告更名曙十二月辛卯朔癸亥掩鈞鈐以十四年曆日賜高麗丁卯改雲南蘿蔔甸爲元江府路辛未賜塔海所部戰士及死事者銀鈔有差賜忽不來等戰功十九人銀千二百兩壬申李思敬告運使姜毅所言悖妄指教妻子爲証帝曰妻子豈爲証者耶詔勿問乙亥定江南所設官府辛巳以軍士圍守崇慶勞苦賜鈔六千錠庚寅詔諭浙東浙江東西淮東西湖南湖北等州軍縣官吏軍民皆以萬戶千戶漁奪其民致令逃散今悉以人民歸之元籍州縣凡管軍將校及宋官吏有以勢力奪民田廬產業者俾各歸其主無主則以給附近人民之無生產者其田租商稅茶鹽酒醋金銀鐵冶竹貨湖泊課程從實辦之凡故宋贅冗科差聖節上供經總制錢等百有餘件悉除免之伯顏言張惠守朱府

庫不俟命擅啓管鑰詔阿木詰其事仍諭江之東西浙之東西淮之東西官吏等檢覈新舊錢穀除浙西浙東江西江東湖北五道宣慰使陞江陵爲上路瑞安府仍爲溫州隴州爲散府荊州復置豐閬縣陞臨洮渭源堡爲縣賜諸王金銀幣帛如歲例賜諸王乃蠻帶等羊馬價賞阿木等戰功及賜降臣吳堅夏貴等銀鈔幣帛各有差賜伯顏阿木等青鼠銀鼠黃袖只孫衣餘功臣賜豹裘獐裘及皮衣帽各有差是歲東平濟南泰安德州漣海清河平濼西京西三州以水旱缺食賑軍民站戶米二十二萬五千五百六十石粟四萬七千七百七十二石鈔四千二百八十二錠有奇平陽路旱濟寧路及高麗潘州水並免今年田租斷死罪三十四人十四年春正月癸巳行都元帥府軍次廣東知循州劉興以城降丙申以江南平百姓疲於供軍免諸路今歲所納絲銀賜嗣漢天師張宗演演道靈應沖和眞人領江南諸路道教戊戌高麗金方慶等爲亂命高麗王治之仍命忻都洪茶丘飭兵禦備癸卯復立諸道提刑按察司甲辰命阿木選銳軍萬人赴闕丁未知梅州錢榮之以城降戊申賜三衛軍士之貧乏者八千三百五十二人各鈔二錠幣十匹己酉賜耶律鑄鈔千錠甲寅敕宋福王趙與芮家貴之在杭越者有司輦至京師付其家丙辰立建都羅羅斯四路守戍烏木等處並置官屬己未以白玉碧玉水晶爵六獻於太廟括上都隆興北京西京四路獵戶二千爲兵置江淮等路都轉運鹽使司及江淮樵茶都轉運使司命嗣漢天師張宗演修周天醮於長春宮宗

演還江南以其弟子張留孫留京師二月辛酉命征東都元帥洪茶丘將兵二千赴上都壬戌瑞州安撫姚文龍率張文顯來降其家屬爲宋人所害賜文龍文顯等鈔有差癸亥彗星出東北長四尺餘甲子遣使代祀嶽瀆后土丙寅改安西王傳銅印爲銀印立永昌路山丹城等驛仍給鈔千錠爲本俾取息以給驛傳之須諸王只必鐵木兒言永昌路驛百二十五疲於供給質妻孥以應役詔賜鈔百八十錠贖還之丁卯荆湖北道宣慰使塔海拔歸州山寨四十七所戊辰祀先農東郊甲戌西川行院不花率衆數萬至重慶管浮屠開造梯衝將攻之其夜都統趙安以城降張珪艤船江中與其妻妾順流走涪州元帥張德潤以舟師邀之珪遂降車駕幸上都辛巳命北京選福住所統軍三百赴上都壬午墮吉撫一州城隆興濱西江姑存之仍選汀州軍馬守禦瑞金縣丙戌連州守過元龍已降復叛塔海將兵討之元龍棄城遁丁亥知南恩州陳堯道貪判林叔虎以城降詔以僧元吉益憐眞加加瓦並爲江南總攝掌釋教除僧租賦禁擾寺宇者以大司農御史大夫宣徽使兼領侍儀司事李羅爲樞密副使兼宣徽使領侍儀司事三月庚寅朔以冬無雨雪春澤未繼遣使問便民之事於翰林國史院耶律鑄姚樞王磐寶默等對曰足食之道唯節浮費靡穀之多無踰醪醴麴蘖况自周漢以來嘗有明禁祈賽神社費亦不貴宜一切禁止從之辛卯湖廣行中書省言廣西二十四郡並已內附議復行中書省於潭州置廣南西路宣撫司於靜江詔鄭鼎所將侍衛軍萬人還京師崔斌阿里海牙同

駐靜江忽都鐵木兒鄭鼎同駐鄂漢賈居貞脫博忽魯禿花同駐潭州癸巳以行都水監兼行漕運司事甲午以鄭鼎所部軍士撫定靜江之勞命還家少休期六月赴上都乙未福建漳泉二郡蒲壽庚印德傳李珪李公度皆以城降丁酉括馬三萬二千二百六匹孕駒者還其主壬寅廣東肇慶府新封等州皆來降癸卯壽昌府張之綱以從叛棄市乙巳命中外軍民官所佩金銀符以色組繫於肩腋庶無褻漬具爲令庚戌建寧府通判郭續以城降黃州歸附官史勝入覲以所部將校于躍等三十一人戰功聞命官之簽書東西川行樞密院事答順言比遣同知隆州事趙孟煒齋詔招諭南平軍都掌蠻羅計贊及鳳凰中壠羅韋高崖等四砦皆降田楊二家禾鵝夷民亦各遣使納款壬子寶應軍人施福殺其守將降於淮東都元帥府詔以福爲千戶佩金符癸丑命汪惟正自東川移鎮肇昌行中書省承制以閩浙溫處台福泉汀漳劍建寧邵武興化等郡降官各治其郡潭州行省遣使上言廣南西路慶遠鬱林昭賀藤梧融賓柳象邑廉容貴潯皆降得府一州十四復立襄陽府襄陽縣平章政事浙西道宣慰使阿塔海爲平章政事行中書省事於江淮郡王合答爲平章政事行中書省事於北京夏四月甲子宋特磨道將軍農士貴知安平州李惟屏知來安州岑從毅等以所屬州縣溪洞百四十七戶二十五萬六千來附安西各省路轉運司事入總管府設鹽轉運司四置樞場於礪門黎州與吐蕃貿易丙子召安撫趙與可宣撫陳巖入覲丙戌禁江南行用銅錢均州復立南漳縣五月癸巳

申嚴大都酒禁犯者籍其家貲散之貧民辛丑千戶合刺合孫死於渾都海之戰命其子忽都帶兒襲職癸卯改廣南西路宣撫司爲宣慰司廣西欽橫二州改立安撫司各道提刑按察司兼勸農事敕江南歸附官三品以上者遣質子一人入侍西番長阿立丁寧占等三十一族來附得戶四萬七百丙子融州安撫使譚昌謀爲不軌伏誅辛亥以河南山東水旱除河泊課聽民自漁乙卯選蒙古漢軍相泰宿衛詔諭思州安撫使田景賢又詔諭瀘州西南番蠻王阿永筠連騰申等處諸族蠻裔使其來附命眞人李德和代祀濟瀆六月丙寅涪州安撫陽立及其子嗣榮相繼來附命立爲慶路安撫使嗣榮爲管軍總管並佩虎符仍賜鈔百錠壬寅賞征廣戰死之家銀各五十兩丁丑置尚膳院秩三品以提點尚食尚藥局忽林失爲尚膳使其屬司有七庚辰賞陽立所部戰士鈔千錠甲申荆湖北道宣慰使黑的得謀者言夔府將出攻荆南諭陽立等與塔海會兵禦之丁亥陞崇明沙爲崇州以行省參政行江東道宣慰使阿刺罕爲中書左丞行江東道宣慰使湖北道宣慰使與魯赤參知政事行湖北道宣慰使秋七月戊子朔罷大名濟寧印鈔局壬辰赦犯盜者皆棄市符寶郎董文忠言盜有強竊賊有多寡似難悉寬於法帝然其言遽命止之丁酉敕自今非佩符使臣及軍情急速不聽乘傳戊戌申禁羊馬羣之在北者八月內毋縱出北口諸隘踐食京畿之禾犯者沒其畜癸卯諸王昔里吉劫北平王於阿力麻里之地械擊右丞相安童誘脅諸王以叛使通好於海都海都弗納東道諸王

亦弗從遂率西道諸王至和林城北詔右丞相伯顏帥軍往禦之諸王怒魯帶率其屬來歸與右丞相伯顏等軍合丙午置行御史臺於揚州以都元帥相威爲御史大夫置八道提刑按察司戊申東川都元帥張德潤等攻取涪州大敗之擒安撫程聰陳廣置行中書省於江西以參知政事江西宣慰使塔出爲右丞參知政事江西宣慰使麥木丁爲左丞淮東宣慰使徹里帖木兒江東宣慰使張榮實江西宣慰使李恆招討使也的迷失萬戶昔里門荆湖路宣撫使程鵬飛閩廣大都督兵馬招討使蒲壽庚並參知政事行江西省事壬子樞大都商稅丁巳湖北宣慰司調兵攻司空山復壽昌黃州二郡賜平宋將帥軍士及簡州軍士廣西死事者銀鈔各有差回水窩淵聖廣源王加封善佑常山靈濟昭應王加封廣惠安丘電泉靈霽侯追封靈霽公以參知政事行江東道宣慰使呂文煥爲中書左丞八月戊午朔詔不花行院西川丁卯成都路倉收羨餘五千石按察司已治其罪命以其米就給西川兵辛未常德府總管魯希文與李三俊結構爲亂事覺命行省誅之車駕敗於上都之北九月壬辰制鐵海青圓符丙申廣東南路廣連韶德惠湖南雄英德等郡皆內附甲辰福建行省以宋二王在其疆境調都督忙兀帶招討高興領兵討之昂吉兒忻都唐兀帶等引兵攻司空山寨破之殺張德興執其三子以歸壬子福建路宣慰使行征南都元帥唆都遣招討使百家奴丁廣取建寧之崇安等縣及南劍州冬十月丙辰朔日有食之己未享於太廟庚申湖北宣慰使塔海略地至夔府

之太原坪擒其將誅之辛酉弛蓋州獵禁乙亥以宋張世傑文天祥猶未降命阿塔海選銳兵防過隆興諸城禁無籍軍隨大軍剽掠者勿過關渡己卯降臣郭曉魏象祖入覲賜幣帛有差壬午置宣慰司於黃州甲申播州安撫使楊邦憲言本族自唐至宋世守此土將五百年昨奉旨許令仍舊乞降聖書從之以行省參政忽都帖木兒脫博忽魯禿花崔斌並爲中書左丞鄂州總管府達魯花赤張鼎湖北道宣慰使賈居貞並參知政事十一月戊子樞密院臣言宋文天祥與其徒趙孟潛同起兵行中書發兵攻之殺孟潛天祥僅以身免詔以其妻孥赴京師右副都元帥張德潤上涪州功賜鈔千錠乙未凡偽造寶鈔同情者並處死分用者減死杖之具爲令庚子命中書省檄諭中外江南既平未宜曰亡宋行在宜曰杭州以吏部尚書別都魯丁參知政事十二月丙辰置中灤唐村淇門驛丁卯以大都物價翔騰發官廩萬石賑糶貧民庚午梁山軍袁世安以其城及金石城軍民來降壬申潭州行省復祁陽縣斬首賊羅飛餘黨悉平乙亥都元帥楊文安攻咸淳府克之以十五年曆日賜高麗國以參議中書省事耿仁參知政事冠州及末年縣水免今年田租導任河復民田三千餘頃賜諸王金銀幣帛等物如歲例賜諸王也不干燕帖木兒等五百二十九人羊馬價鈔八千四百五十二錠賞拜答兒等千三百五十五人戰功金百兩銀萬五千一百兩鈔百三十錠及納失失金素幣帛貂鼠豹裘衣帽有差是歲賑東平濟南等郡饑民米二萬一千六百十七石粟二萬八千六百十三石鈔萬一

百十二錠斷死罪三十二人十五年春正月辛卯阿老瓦丁將兵戍幹端給米三十石鈔三千錠以千戶鄭都那有戰功陞萬戶佩虎符癸巳西京饑發粟一萬石賑之仍諭阿合馬廣貯積以備闕乏順德府總管張文煥太原府達魯花赤太不花以按察司發其奸贓遣人詣省自首反以罪誣按察司御史臺臣奏按察司設果有罪不應因事而告宜待文煥等事決方聽其訴從之己亥收括闕遺官也先闊闊帶等坐易官馬闕遺人畜免其罪以諸路州縣管民官兼領其事官吏隱匿及擅易馬匹私配婦人者沒其家禁官吏軍民賣所娶江南良家子女及爲娼者賣買者兩罪之官沒其直人復爲良賜湖州長興縣金沙泉名爲瑞應泉金沙泉不常出唐時用此水造紫筍茶進貢有司具牲幣祭之始得水事訖輒涸宋末屢加浚治泉迄不出至是中書省遣官致祭一夕水溢可溉田千畝安撫司以事聞故賜今名封磁州神隄府君爲齊聖廣佑王壬寅弛女直水達達酒禁丙午安西王相府言萬戶禿滿答兒郝札刺不花等攻克瀘州斬其主將王世昌李都統戊申從阿合馬請自今御史臺非白於省毋擅召倉庫吏亦毋究錢穀數及集議中書不至者罪之授宋福王趙與芮金紫光祿大夫檢校大司農平原郡公庚戌東川副都元帥張德潤大敗涪州兵斬州將王明及其子忠訓總轄韓文廣張遇春詔軍官不能撫治軍士及役擾至逃亡者沒其家貲之半以阿你哥爲大司徒兼領將作院二月戊午祀先農蒙古胄子代耕籍田癸亥咸淳府等郡及良平民戶饑以鈔千錠

賑之命平章政事阿塔海阿里選擇江南廉能之官去其冗員與不勝任者復立河中府萬泉縣辛未以川蜀地多嵐瘴弛酒禁丁丑焚惑犯天街庚辰征別十八里軍士免其徭役壬午參知政事福建路宣慰使唆都率師攻潮州破之置太史院命太子贊善王恂掌院事工部郎中郭守敬副之集賢大學士兼國子祭酒許衡領焉改華亭縣為松江府遣使代祀嶽瀆以參知政事夏貴范文虎陳巖並為中書左丞黃州路宣慰使唐兀帶史弼並參知政事三月乙酉詔蒙古帶唆都蒲壽庚行中書省事於福州鎮撫瀕海諸郡以沿海經略副使合剌帶領舟師南征陞經略使兼左副都元帥佩虎符丁亥太陰犯太白戊子太陰犯熒惑己丑行中書省請考覈行御史臺文卷不從甲午西川行樞密院招降西蜀重慶等處得府三州六軍一監一縣二十柵四十蠻夷一乙未宋廣王昺遣倪堅以表來上令侯命大都命揚州行省選鐵木兒不花所部兵助隆興進討丁酉命塔海毀夔府城壁戊戌劉宗純據德慶府梧州萬戶朱國寶攻之焚其寨柵遂拔德慶詔中書左丞呂文煥遣官招未生熟奈軍堪為軍者月給錢糧不堪者給牛屯田庚子漢軍都元帥李庭自願將兵擊張世傑從之西川行樞密院招宜勝土恢等城及石樞寨相繼來降壬寅以諸路歲比不登免今年田租絲銀癸卯都元帥楊文安遣兵攻克紹慶執其郡守鮮龍命斬之乙巳廣南西道宣慰司遣管軍總管崔永千戶劉潭王德用招降雷化高三州即以永等鎮守之宋張世傑蘇劉義挾廣王哥奔稠洲參知政事密立忽辛張守智

並行大司農司事夏四月乙卯命元帥劉國傑將萬人北征賜將士鈔二萬六百七十一錠修會川縣盤古王祠祀之丙辰詔以雲南境土曠遠未降者多簽軍萬人進討戊午以江南土寇竊發人心未安命行中書省左丞夏貴等分道撫治軍民檢覈錢穀察郡縣被旱災甚者吏廉能者舉以聞其食殘不勝任者劾罷之甲子命不花雷鎮西川汪惟正率獲功蒙古漢軍官及降臣入覲大都巡軍之戍西川者遣還立雲南湖南二轉運司以時雨霑足稍弛酒禁民之衰疾飲藥者官為釀釐量給之辛未置光祿寺以同知宣徽院事禿剌鐵木兒為光祿卿廣州張鎮孫叛犯廣州守將張雄飛棄城走出兵臨之鎮孫乞降命遣鎮孫及其妻赴京師丁丑雲南行省招降臨安白衣和泥分地城寨一百九所威楚金齒落落分地城寨軍民三萬二千二百禿老蠻高州筠連州等城寨十九所庚辰以許衡言遣使至杭州等處取在官書籍版刻至京師壬午立行中書省於建康府中書左丞崔斌言比以江南官冗委任非人命阿里等沙汰之而阿合馬溺於私愛一門子弟並為要官詔並黜之又言阿老瓦丁臺臣劾其侵欺官錢事猶未竟今復授江淮參政不可詔止其行敕自今罷免之官宰執為宣慰宣慰為路官路官為州官准浙鹽課直隸行省宣慰司官勿預改北京行省為宣慰司追江南工匠官虎符五月癸未朔詔翰林學士和禮霍孫今後進用宰執及主兵重臣其與儒臣老者同議乙酉行中書言近討邵武建昌吉撫等嚴洞山寨獲毒大老戴異子餘黨皆下獨張世傑據稠洲攻傍郡未易

平擬遣宣慰使史格進討詔以也速海牙總制之救主兵官若已擢授其舊職宜別授有功者勿復以子孫承襲申嚴無籍軍據掠及備奴代軍之禁甲午諸職官犯罪受宣者聞奏受赦者從行臺處之受省札者按察司治之其宣慰司官吏姦邪非違及文移案牘從本道提刑按察司磨刷應有死罪有司勘問明白提刑按察司審覆無冤依例結案類奏待命自行中書以下應行公務小事限七日中事十五日大事三十日選江南銳軍為侍衛親軍乙未以烏蒙路隸雲南行省仍詔諭烏蒙路總管阿牟置立站驛修治道路其一應事務並聽行省平章賽典赤節制立川蜀水驛自叙州達荆南府已亥江東道按察使阿八亦求江東宣慰使呂文煥金銀器皿及宅舍子女不獲誣其私匿兵仗詔行臺大夫相威詰之事自免阿八亦官辛亥制授張魯孫江南諸路道教都提點賜拱衛司官及其所部四百五十八人鈔二千六十錠六月乙卯改西蕃李唐城為李唐州庚申救博兒赤荅刺赤及司糧司幣等官並勿授符已授者收之壬戌賜瀘州降臣薛旺等鈔有差丙寅以江南防拓關隘一十三所設官太冗選軍民官廉能者各一人分領陞濟南府為濟南路降西涼府為西涼州丁卯置甘肅和羅提舉司以備給軍餉賑貧民甲戌詔汰江南冗官江南元設淮東湖南隆興福建四省以隆興併入福建其宣慰司十一道除額設員數外餘並罷去仍削去各官舊帶相銜罷茶運司及營田司以其事隸本道宣慰司罷漕運司以其事隸行中書省各路總管府依驗戶數多寡以上中下三等設官宋放官